

# Eddara

So tempi smimurati ch'inalzi li to frondi  
Fruttu di a libartà cù radichi prufondi,  
Pinsendu d'essa salvu dopu à funesti stondi  
Ùn l'hai vistu nascita 'ssu mali chì s'ascondi.

Malgradu i vinici fatti da fiari è venti  
Nimu ghjungsi à piicà u to fustu valenti,  
Ti cridii eternu di pettu à i turmenti  
Scurdendu a prisenza d'un essa praputenti.

À l'appiattu s'intriccia  
Cresci è pidda forza,  
L'eddara ghjunghjiticcia  
À l'infinita risorsa,  
Ch'ammanta a curticcia  
D'ugni tramula corsa.

Tralsciendu u cippu pà un altra natura,  
Di u suchju di tandu pirdisti a primura,  
Mentri s'arrampicaia ascosa in a bughjura  
A rimigna spuntata da stirpà a cultura.

D'andatura dicisa oghji s'imbuffa fiera  
Sparghjendu i so reti sin'à l'assuffuchera,  
Chì l'arburu di tandu ormai s'addispera  
D'un veda spuntà l'ora di fà a diraschera.

À l'appiattu s'intriccia  
Cresci è pidda forza,  
L'eddara ghjunghjiticcia  
À l'infinita risorsa,  
Ch'ammanta a curticcia  
D'ugni tramula corsa.